

Ժ

Ս. ՊԵՏՐՈՍԻ ՎԱՆՔԸ ԵՐՈՒՍԱՂԷՍԻ ՄԷՋ (Հառաչումն Պետրոսի)

Արդէն նկարագրեցինք Ս. Փրկչի վանքը որ շինուած էր Կայիափայի տան տեղւոյն վրայ, և ուր Պետրոս առաքեալ ուրացաւ իր վարդապետը և այս դէպքին յիշատակին համար էր՝ որ Հայերը կառուցին նոյն վանքը և արարացիք անոր Հապս էլ-Մէսիհ անունը կուտան:

Ս. Պետրոսի անուամբ շինուած է Ե. դարուն վանք մը ևս, Սիոն լերան արևելեան կողին վրայ, ի յիշատակ Պետրոս առաքելոյն զղջման և ապաշխարութեան: Ոմանք խնդիր կը յարուցանեն ըսելով թէ՛ Հայոց Ս. Փրկչի վանքին կառուցումը աւելի վերջին դարերու աւանդութեան համաձայն է, վաղնջական աւանդութիւնը և նորագոյն հետազոտութիւնները կ'ապացուցանեն թէ Կայիափայի տունը կը գտնուի Սիոնի արևելեան կողմը, Սելովամ գացող ճանապարհին զառիվայրին վրայ, և թէ այդ տան տեղւոյն վրայ շինուած է տաճար մը Պետրոսի թէ՛ ուրացման և թէ՛ ապաշխարութեան յիշատակին համար. նոյն տեղւոյն այժմու սեպհականատէր Աստմբսիոնիսդներուն կարծիքն է այս, որուն հակառակը կը գրեն ուրիշ գիտուններ և մասնաւորապէս Յրանչիսկեանք: Թէ՛ աւանդութիւնը և թէ՛ ուխտաւորաց Ուղեգրութիւնները կ'ապացուցանեն թէ յանուն Ս. Պետրոս առաքելոյն երկու եկեղեցիներ կառուցուած են, մին՝ ուրացման տեղւոյն վրայ, որ է Հայոց Ս. Փրկչի վանքը, միւսն՝ Սիոնի արևելեան կողմը, Սելովամ տանող ճանապարհին վրայ, և ան կը կոչուի Պետրոսի հառաչանաց վանքը:

Այս երկրորդ վանքին առաջինէն զատ ըլլալուն և անոր գոյութեան մասին ուղեգրաց պատմական ծանօթութիւնները մէջբերելէ յետոյ, վանքին հայկական հիմնարկութիւն մը ըլլալուն և անոր նկարագրութեան վերաբերութեամբ օտարազգի երկու մասնագէտ գիտուններու մէկ գրուածքը պիտի թարգմանենք,